

Buch

708

so stercken sie das hürne vñnd vermu-
wen die winde des lebens gnant spiri-
tus. Wann auch das rosen wasser nit
verhanden ist so mag man die gnantē
vßgenge stücken mit rege wasser dar in
rosen gesotten syn ein zytlang. Oder ge-
stosene rosen mit eyes wyß vñnd mit es-
sige geplastert vber die niere vñ vber
dem gmechte. **O**d vber das hertz grü-
belyn wider das brechen. Wan auch
ein mensche ganz onmechtig were vñ
der dinge keyns hette oder vberkömen
möchte so sol man ime machen ein pul-
uer von rosen vñnd ime das in geben in
einem weychen eye. Rosen gekocht in
wasser vñnd des nachtes gelegt vber
die roten angen die den menschen stech-
en das hilffet sie. Die gelben blüemelyn
mitten in den rosen in dem latin gnāt
anthera die syn auch gut wider die vor-
gnanten sachen. Wer sie zu puluer ma-
chet vñnd bleset sie vñnder das zü schwol-
len zungelyn oder zepffelyn sie benemen
ime die vberige suchtkreyt. Auicenna
der meyster spricht das rosen vertrybē
den gestanke des schweyßes vñnd nem-
lich vñnder den armen wan sich der mē-
sche im dem bade da mitt rybet. Das
thut auch das rosen wasser zu aller zyt
wan ein mensche mit einem duche sich
da mitt kület. Auch ist zu wissen dz der
safft der grünen rosen in einem gläserne
vase sich wol haltē mag ein iar lang.
Auch ist zu wissen das ein plaster von
gesottenen vñnd gestosenen rosen vñnd
mit vß gedrungen gelegt vff die hitzige
apostemata machet sie zytig vñnd dar
zu vß brechen.

(Von Rosmarino.



Rosmarin ist ein struch alle
zyt grüne vñnd ist erlicher
mase enlich dz zanipro oder
besem baume. Er belustiget
sich by dem mere in heysen landen. da
von ist er gnant rosmarin. Er wirt ger-
pflantet mit den zwergelin ake gebro-
chen von synem stame vñnd auch von
den sproßlingen vß synen wüurzeln. in
mōnden vñnd zyten wan andere pflanz-
ungen gescheen. Er ist warmer vñnd
dreckener nature aber die lerer sprechen
nit vß im welchem grade. Syn laub
vñ auch syn blüte syn beqweme zu der
arzenye vñnd syne blüte in dem latin
ist gnant anthos. vñ den wirt gemacht
ein electuarium gnant dyanthos. Das
bewmelyn wirt auch gnant lanotides
oder detrolbanos dar vñnd wer die na-
men syndet in der arzenye der sol ver-
stan vñ nemen die bletter des bewme-
lyns. Die blüte getrückenet an der son-
nen werden guter krafft ein iare. Syn
krut hat krafft zu stercken von wegen